



bondia.aruba@gmail.com

Concierto Dominical “Donny Laclé” diadomingo dia 26 di April 2009

Un mainta cu hopi sorpresa

ORAJESTAD - Nos ta yegando fin di luna atrobe y esey kier men cu nos ta cla pa presenta nos Concierto Dominical “Donny Laclé”. Diadomingo awor, dia 26 di April, den The French Steak House di Manchebo Beach Resort & Spa, lo tin un tremendo concierto atrobe.

E concierto ta habri cu e cantante internacional Victor Samuel, miho conoci como “El Duque”. El Duque ta hopi den exterior pa su trabou artistico y por a gar’e net na tempo pa e concierto aki. Diadomingo awor su bos sonoro lo deleita su publico cu diferente cancion hopi gusta. Vivian Lampe, yiu muhe di Padu, ta compa’ e na piano.

E hobencita Mandy Villasmil di 14 aña ta debuta den e programa aki como pianista solista. Mandy ta canta y ta toca synthesizer den un grupo di gaita. Cu ocho aña el a haya su prome lesnan di piano cerca su tio grandi Toti Arends. Diadomingo awor e tin un repertorio di composicion clasico y Arubiano.

Un otro cantante cu a cosecha fama internacional ta Angela

Croes. Angela Croes tabata forma “Duo Scarlata” hunto cu Mateo, un cantante Venezolano. Aworaki Angela tin 20 aña caba ta canta Gospel. Recientemente el a bira director manager di “Musa”, un concepto artistico nobo caminda antes tabata “Access Art Galerie”. Angela a prepara un repertorio varia pa diadomingo awor.

Ta clausura e programa cu presentacion special di Roy y su Grupo Sorpresa. Manera nos ta custumbra di Roy Sneek, e no tin problema pa dirigi un orkestra grandi cu hopi instrumento y cantante.

Su orkestra ta consisti di: seis guitarrista, seis cuartista, Albert Croes y Danny Koolman (piano), Robert Jeandor (baho), Flor Huygen (flauta), Fio Wester (percusion). E orkestra aki ta compaña masha hopi cantante conoci, esta Nilka Franka, Arlene Wever-Croes, Annette Wongsomito, Sharon Rose, Danny Koolman, Papito Rafael, Robert y Percey Jeandor.

E repertorio ta scogi specialmente pa e dia aki y lo ta un sorpresa di



berdad. Kiermen, e programa ta yen y varia y ta tene cuenta cu tur gusto musical.

Cu hopi gracia tur e artistanan a prepara pa por comparti nan arte na un manera di kita sombre cu tur presente. P’esey e organisadornan ta spera cu “The French Steak House” lo

ta yen yen atrobe pa goza di nos talentonan y pa stimulan.

E musiconan ta toca gratis y entrada ta gratis. Ta pidi solamente un donacion boluntario pa e “Fundacion pa Talento Musical”.

E concierto ta cuminsa exactamente 11.00 or y ta caba 13.00 or. Ta recomenda si pa yega na tempo pa haya un bon lugá di sinta.

Un y tur ta bonbini diadomingo awor.